

# INUIT ATAQATIGIIT INATSIARTUNI



UKA2021/072

Ulloq: 21. oktober 2021

Sofia Geisler

**Uani qinigaaffimmi Ilulissani GUX-imik pilersitsinissamut  
suliaqarnissamik Naalakkersuisut peqquneqarnissaannik  
Inatsisartunut aaliangiiffigisassatut siunnersuut.**

(Inatsisartunut ilaasortaq Nivi Olsen, Demokraatit)

Siunnersuummut, tassungalu tunngavilersuutigineqartunut, Nivi Olsen, Demokraatit, qujanaq.

Siunnersuutip qulaani taaneqartup itigartinneqarnissaanik Naalakkersuisut innersuussinerat, tamatumunngalu akissuteqaammi tunngavilersuutaat, Inuit Ataqatigiinniit tusaatissatut tiguvagut.

Naalakkersuisut ilaatigut innersuussutigivaat §37 naapertorlugu apeqqummut nr. 39/2021-mut akissuteqaatertik, tassani ilisimatitsissutigineqarluni tallimanik sammivilimmik ilinniarfiliortoqarpat ikinnerpaamillu 15-inik klassitaqassappat ukiunullu pingasunut avinneqassappat sanaartornera 229.008.000 kr.-it missaannik akeqassaaq, ingerlannera ukiumut 27.750.000 kr.-nik akeqassaaq ilinniartunullu inissialiornermut 570.000.000 kr.it missaat atorneqassallutik.

Nunatsinni GUX-it sisamaapput. 2018-imi meeqqat atuarfianni naammassisut amerlanersaat, tassalu 81 procentii, gymnasiani atualerput, allat 19 procentii inuussutissarsiutigalugu ilinniartitaanerni aallartittut.

Taamaattumik isumaqarnarpoq Nunatsinni atorfissaqartitagut GUX-it pigigigut. Isiginiagassarput tassaasariaqarsorivarput assassorluni inuussutissarsiutigalugu ilinniarfiit inerisarnissaat. Taakkumi

# INUIT ATAQATIGIIT INATSISARTUNI



atorfissaqartippagut, tassami ilisimareerparput ullumikkut amigaatigineqarmata inuit 1000-it missaat suliamik ilinniagaqarsimasut ilinniagaqarsimannngitsullu, ilaatigut sanaartornermi, ukiumut atorfissaqartinneqartut.

Taamaattumik Inuit Ataqatigiinniit innersuussutigissavarput immikkoortoq 107, tassanilu Naalakkersuisut allannguutissatut siunnersuutaat, siunertaqartoq Naalakkersuisut peqquneqassasut nassuiaammik UPA 2023-mut saqqummiusseqqullugit, iluaqutaasinnaasut aamma ajoqutaasinnaasut pillugit nunamut tamarmut atuuttumik inuussutissarsiornermut ilinniarfimmik nutaaliorfiusumik pilersitsisinnaaneq pillugu. Aamma innersuussutigissavarput imm. 95, Kommune Qeqertalimmi Avannaata Kommuneanilu inuusuttut ilinniartitaanerannut tunngasumik imalik ataatsimiititaliamut ingerlatinneqareersoq.

Inuit Ataqatigiinni naliliivugut ilinniartitaanerit ataatsimut isigisariaqarivut, aningaasallu atugassarititaasut iluanni tamanna pitsaanerpaamik qanoq angusinnaaneripput aallaaviussasoq kiisalu inuusuttut amerlassutsimikkut siunissami ikiliartortussat ilisimariikkagut eqqarsaatigalugit tamanna pissasoq.

Taasissutissatut oqaasertaliunneqartoq innersuussutigalugu Inuit Ataqatigiinniit siunnersuut itigartinneqassasoq innersuussutigaarput.